

Vischnaunca Lumnezia ei proactiva

A Vella ha il project dalla surbaghegiada entschiet

■ (anr/abc) Ier ha la suprapostion communal da Lumnezia envidau all'empres badelada a Vella. Gest sper la casa communal baghegia la vischnaunca la nova casa dil miedi cun stizun, biros e spazi d'habitar. Tochen il november 2017 duess la casa esser semtgada. «Ei ha buca senn dad adina mo selamentar e tagnar ch'ei mondi nuot. Zacu ston ins sez daventar activs», ha Duri Blumenthal getg el discuors cull'anr. Ier ei il president communal da Lumnezia staus en funcziun sco empren polier. Ensem cun ses consuprastonts Primus Cavegn e Clemens Arpagaus sco era culs representants dad architect ed impressaris ha el dau l'empres badelada dalla surbaghegiada Palius. La vischnaunca Lumnezia semuossa proactiva ed ier ha la fasa finala d'ina lunga procedura leutier entschiet.

Attractiva pratica da miedi

Il project «Palius» a Vella duei survir all'entira vallada. Igl architect Tommaso Arnaboldi ha representau siu patrun Gion Antoni Caminada. Lez haveva gudignau la concorrenza da project per realisar la surbaghegiada Palius. Ier ha la fasa da construcziun entschiet. La vischnaunca Lumnezia investescha la summa da 4,8 milliuns francs a favur d'in center da survetschs. Ils responsabels han dau l'empres badelada per in project che vegn exequius tenor la voluntad dalla populaziun lumneziana. Votantas e votants havevan concediu ils 3 da fenadur 2016 in credit da 4,8 milliuns francs per quei scop. «La periferia sto sedustar. Nus fagein tut il pusseivel da tener la populaziun ella vallada. Ina premissa impurtonta eis ei da metter a disposiziun ils sur-



L'empres badelada dalla surbaghegiada Palius han dau: Tommaso Arnaboldi, Primus Cavegn e Duri Blumenthal (da dretg). Seniester il meinabaghetg Gioni Cavelti.

FOTO A. BEELI

vetschs», ha Blumenthal declarau. Il proviediment medicinal ei perinagada garantius. Ins hagi il cletg ch'in giuven miedi vegli prender domicil ella vallada e surprender la pratica da Gian Bundi. Il miedi dalla vallada vegn a saver surdar sia pratica ad in successur. Il giuven miedi Mario Venzin cun famiglia vegn a prender domicil ella vallada. A Vella ha el a disposiziun ina surfatscha adattada per

sia pratica da miedi da casa. Duri Blumenthal ha confirmau ch'ei setracti d'ina pratica attractiva cun purschida medicinala actuala. Ei savess schizun esser che glied d'ordeifer la vallada va el futur a Vella tiel miedi. Era plirs miedis sappien luvrar en quella pratica, quei che seigi d'engrau el temps ch'ei vegni savens parti plazzas e che tut tschontschis da job-sharing.

La stizun ed auters survetschs

La surbaghegiada Paliu dat era in signal al proviediment da basa dalla populaziun lumneziana. La societad cooperativa ViVal Lumnezia vegn a bardigliar aunc uonn ella stizun nova situada paucs meters dasperas. Grazia all'architettura cun elements eis ei pusseivel da realisar igl object enteifer aschi cuort temps tochen

il november 2017. Tommaso Arnaboldi, collaboratur da Gion A. Caminada, ha planisau ina casa funcziunala che s'accorda cul contuorn. La stizun ViVal ha a disposiziun el plaunterren dil baghetg ina surfatscha da vendita da rodund 210 m², vitier aunc 45 m² per biro e locals annexs. Suenten che la stizun vegn a bandunar las localitads veglias eis ei previu d'endrizzar la biblioteca communal en lez liug.

La stizun da ViVal e la pratica da miedi ein ils survetschs centrals dalla casa nova. Amiez Vella, respectiv amiez la vallada, ha la populaziun cun quei a disposiziun ils biars survetschs. Casa communal, bancas, stizun, casa dil miedi, piazza da giugs, buca lunsch naven ustrias ed era la casa da vegls e da tgira garantesch che bia glied vegn a sefermar en quei liug gest sper la via lumneziana. Sco quei ch'il cau d'immobilies dalla vischnaunca Lumnezia, Primus Cavegn, ha declarau han ils proprietaris da parcelas ella vischinonza purschiu maun da realisar l'ovra. Aschia fa il clavau silla parcella davostier plaz ad in baghetg annex tier il niv center Palius.

Suenten ch'il pievel lumnezian haveva approbau il credit cun 307 vuschs gie encunter 150 na ha la vischnaunca saviu publicar la damonda da baghegiar. Tenor quella publicaziun dils 15 da fenadur vegn construui dus baghetgs: Inagada la casa da fatschenta cun stizun, pratica e habitaziun gronda sut tetg da 150 m². El baghetg annex dat ei garaschas ed ina habitaziun da 90 m². Sco quei che Primus Cavegn ha confirmau san las surfatschas era vegnir duvradas per endrizzar biros ni ulteriuras purschidas sco terapia, studio da fitness ni auters survetschs.